

Firaun Aur Uskī Qaum Par Azaab

Taurait : Hijrat 12:1-32

Jab Musā^(a.s) aur Haarun^(a.s) Misr me the, to Allaah taa'alā ne un se kahā, ⁽¹⁾ “Ye maheenā tumhaare liye saal kā pahalā maheenā hai. ⁽²⁾ Merī baat ko Ibraaniyon tak pahuñchao aur kaho ki is maheene kī dasween taareekh ko har ghar apne liye jaanwaron ke jhuñd me se ek jaanwar chune. ⁽³⁾ Agar ghar ke log us jaanwar ke hisaab se kam hai to wo apne padosiyon se is tarah bañtawara kareñ ki har ek gharwaale ke hisse me khaane ke liye kuch gosht ae. ⁽⁴⁾ Tumhaare gharwaale qurbaanī ke liye ek saal kī nar bheḍ yā bakrā chun sakte haiñ lekin us me bilkul bhī aib naheen honā chaahie. ⁽⁵⁾ Us jaanwar kā kḥyaal rakhnā aur chaudahweñ din kī shaam dhalne ke baad hī usko zibaah karnā. ⁽⁶⁾ Us jaanwar kā kuch kḥun apne darwaaze ke uprī aur kinaare kī chaukhaṭ par lagaanā. ⁽⁷⁾ Us gosht ko raat me bhun kar khaṭṭī jaḍī-buteeyon aur binā kḥameer kī roṭī ke saath khaanā. ⁽⁸⁾

“Tum log us gosht ko kacchā yā ublā huā mat khaanā. Usko sahī se āg ke upar, añdar, baahar, sar kī taraf, aur pairon kī taraf se bhun kar hī khaanā. ⁽⁹⁾ Subah tak uskā gosht bachnā naheen chaahie. Agar sabke khaane ke baad bhī kuch bach gayā ho to usko jalā denā. ⁽¹⁰⁾ Is khaane ko is tarah se taiyaar ho kar khaanā ke jaise tum log kaheen jaane waale ho, pairon me jute aur haathon me chaḍī honī chaahie. Ye mere azaab se bachne kī qurbaanī hai. ⁽¹¹⁾ Us raat ko main azaab kā farishtā bhejuñgā jo Misr se ho kar guzregā aur har pahalauthe laḍke par maut kā azaab giregā. Is tarah main Misr ke saare kḥudaaon kā imtihaan luñgā, ‘Main kḥudā huñ. ⁽¹²⁾ Tumhaare ghar ke darwaazon par kḥun is baat kī nishaanī hogī ki tum logoñ ne merā kahnā maanā aur yahaan rahte ho. Jab main Misr me azaab bhejuñgā to azaab kā farishtā kḥun dekh kar us ghar ko choḍ degā aur tum logoñ ko zarā bhī nuksaan naheen pahuñchegā. ⁽¹³⁾ Ye wo din hai jisko tum hameshā yaad rakhnā. Tumhaarī āne waalī naslon ke log bhī isko is dhum-dhaam se manaaen ki jaise ye tumhaare rab kā kḥaas tyohaar hai. ⁽¹⁴⁾ Is tyohaar ke pahale din tum log apne gharon se kḥameer ko nikaal denā aur agle saat dinon tak binā kḥameer kī roṭī khaanā. Tum me se jo bhī in saat dinon me kḥameer kī roṭī khaae to usko Ibraanī qaum se nikaal denā. ⁽¹⁵⁾ Is tyohaar ke pahale aur saatweñ din paak hoñge. Koī bhī un dinon khaanā banaane ke alaawā aur koī kaam naheen karegā. ⁽¹⁶⁾ Tum log is tyohaar ko, binā kḥameer kī roṭī se yaad rakhnā, jis din maine tumko Misr se nijaat dilaā thī. Tum aur tumhaarī āne waaleen pushten bhī is tyohaar ko dhum-dhaam se manaaengī. ⁽¹⁷⁾ Saal ke pahale maheene me, chaudahweñ din kī shaam se le kar ikkeesweñ din kī shaam tak tum log binā kḥameer kī roṭī khaanā. ⁽¹⁸⁾ Un saat dinon me ye pakkā kar lenā ki tumhaare gharon me kḥameer bilkul bhī naheen ho aur agle saat dinon tak binā kḥameer kī roṭī khaanā. Tum me se koī agar in saat dinon me kḥameer kī roṭī khaaegā to usko Ibraanī qaum se baahar nikaal denā, chaahe wo ādmī Ibraanī ho yā baahar kā jo tum logoñ ke beech rah rahā ho. ⁽¹⁹⁾ Is tyohaar ke dauraan tum log kḥameer se banī huī koī bhī cheez mat khaanā. ⁽²⁰⁾

Tab Musā^(a.s) ne Ibraaniyon ke sardaar ko bulaayā aur kahā, “Ye waqt hai ki har Ibraanī gharwaale azaab se bachne ke liye ek jaanwar kī qurbaanī den ⁽²¹⁾ aur hissop kī pattiyon ko qurbaanī ke kḥun me ḍubo kar darwaaze ke kinaare aur uprī chaukhaṭ par lagaaen. Tum me se koī bhī subah tak apne gharon se baahar naheen niklegā. ⁽²²⁾ Raat ke waqt Allaah taa'alā Misr par azaab bhejegā lekin tumhaare gharon par kḥun ke nishaan ko dekh kar use choḍ degā. Allaah taa'alā us azaab ko tumhaare ghar ke añdar jaane se rok degā. ⁽²³⁾ Tum aur tumhaarī āne waalī naslen is tyohaar ko manaaengī. ⁽²⁴⁾ Jab tum us waadā karī huī zameen par pahuñchoge to tum is tyohaar ko manaaoge. ⁽²⁵⁾ Jab tumhaare bacche tum se pucheñ ki ye kaisā tyohaar hai to ⁽²⁶⁾ tum kah denā ki ye Allaah taa'alā ke azaab se bachne ke liye qurbaanī hai. Allaah taa'alā ne jab Misr me us raat azaab naazil kiyā to saare Ibraanī logoñ ko bachā liyā thā.” Jab unhone Allaah taa'alā kā ye paiḡaam sunā to wo log sajde me gir gae aur ibaadat karne lage. ⁽²⁷⁾ Tab un logoñ ne Allaah taa'alā ke hukm ke mutaabiq waisā hī kiyā jaisā Musā^(a.s) aur Haarun^(a.s) ne unko bataayā thā. ⁽²⁸⁾

Us ādhī raat me Allaah taa'alā ne azaab naazil kiyā aur Firaun ke pahale beṭe se le kar us ke kaidiyon ke pahale beṭe aur maweshiyon ke pahale bacche mar gae. ⁽²⁹⁾ Firaun, uske naukar aur baaqī sabhī Misriyon kī neendeñ ādhī raat me khulī. Har koī cheekh maar kar ro rahā thā kyuñki us raat har Misrī ke ghar me ek maut huī thī. ⁽³⁰⁾ Firaun ne Musā^(a.s) aur Haarun^(a.s) ko ādhī raat ko bulā bhejā aur kahā, “Yahaan se chale jao. Tum mere logoñ ko baḥsh do aur apne rab kī ibaadat karo jaisā ki tum chaahte the. ⁽³¹⁾ Apne saare jaanwaron ko bhī yahaan se le jao lekin jaane se pahale mere liye barkat kī duā karo. ⁽³²⁾